

ACARA PARTANGIANGAN TAON BARU KELUARGA

01 Januari 2025 - JAM 00.00

01. Pangaradeon :

- a. Dipilit ma sahalak na manguluhon Partangiangan
- b. Dipilit ma sahalak na manguluhon Tangiang Pangondianon
- c. Diparade ma Lilin dohot Kantong Pelean

02. Joujou tu partangiangan : U = Uluan ; K=Keluarga

U: Selamat Taon baru ma di hita saluhutna. Tadok ma mauiate di pandonganion dohot pasu-pasu ni Debata di pardalanan ni ngolunta.

K: Selamat Taon Baru, mauiate ma di Debata di inganan na tumimbul i.

U: Hamu angka dongan hinaholongan ni Tuhan Jesus Kristus, tapuji ma Tuhanta sitompa saluhut na mandongani hita mandalani taon 2024, jala na patolhashon hita mamongoti taon 2025 on.

K: Tapuji ma Debata na mangaramoti hita sahat tu taon 2025 on.

U: Taparade ma dirinta laho mamuji Debata marhite partangiangan Bona taon on. Alani martangiang na hohom ma hita.

U: Amen.... Tapuji Tuhanta, marende ma hita!

03. Marende BE HKBP No. 70 : 1-2 “Naung salpu taon na buruk i” (huhut pagalak lilin) BL. 36

Naung salpu taon na buruk i, Ho ma hupuji Tuhanhi

Ai diramoti Ho tongtong tondingku dohot dagingkon

Ai diramoti Ho tongtong tondingku dohot dagingkon.

O Jesus sai asi rohaM, paian denggan ni basaM

Muse di taon naimbaru on di nasa huriaM tongtong

Muse di taon naimbaru on di nasa huriaM tongtong

04. Tangiang Pamuhai : (sian na manguluhon)

05. Manjaha hata ni Debata :

U: Hata ni Debata sijahaon di Bona ni taon na imbaru on, ima na tarsurat di **Poda 30 : 24 – 28, tajaha ma marsingkat sorin** : Na opat ragam on do apala na metmet di tano on, alai tung na bisuk sahali do i jala angka na bistok.

K: I ma angka porhis, sada bangso na so margogo nian, alai diparade do bohalna di partaonan logo ni ari.

U: Angka ampodi i ma sada bangso na so tambos nian, alai dibahen do asarna di bagasan dolok batu.

K: *Ndang marraja nian angka sihapor, alai sahali borhat do luhutna marhoronhoron*

U: Babibabi manangkup dohot patna nian, hape maringan do di bagasan jabu ni raja.

Ido sahatna. Martua do angka na tumangihon hata ni Debata jala na umpeopsa. , Amen

06. Marende BE HKBP No. 66 : 1+3 “Debata baen donganmi” BL. 52

Debata baen donganmi, lao mangula ulaonmu

Baen Ibana haposanmu sai paserep rohami

Debata baen donganmi, Debata baen donganmi

Debata baen donganmi sai na saut do ulaonmu

Sai na tulus do sangkapmu jala sonang rohami

Debata baen donganmi, Debata baen donganmi

07. Jamita : (dijahahon na manguluhan)

Jeremia 29 : 11

“MANGALANGKA RAP DOHOT TUHAN I”

Ai nunga tangkas Huboto sangkap angka na Husangkapi taringot tu hamu, ninna Jahowa, sangkap hasonangan do tahe ndada tu hamagoan, asa Ahu mangalehon tu hamu ujung na hinalungunhonmuna.

Huria ni Tuhanta..., nuaeng nunga bongot hita tu taon na imbaru ima taon 2025. Dung manghuling giring-giring tanda parsirangan ni taon, dipasunggulhonon i do tu rohanta paboa naung tatinggalhon ma taon na buruk 2024 jala bongot hita tu taon na imbaru taon 2025 on.

Jala on ma sada partingkian na mansai uli di hita laho marningot ari-ari naung tabolus di taon na salpu, huhut laho parade diri manomu-nomu taon na imbaru 2025 on. Denggan do sungkunhononta tu dirinta ganup, aha do na boi gabe parsiajaran na uli di hita marhite ari-ari naung tabolus di taon na salpu ?. Jala aha do na ingkon paradeonta laho mandalani taon na imbaru on ?. Mansai ringkot do i, ala ndang holan na marganti ari, bulan dohot taon on, alai sada kesempatan do on di hita ganup laho pauli-uli diri, pauli angka parulaon huhut lam pajonpok diri tu Debata, anggiat nian lam marimpola ngolunta ganup.

Tontu godang do na mambahen las rohanta di angka taon na salpu, godang angka keberhasilan manang pencapaian na tajalo, ragam pasu-pasu dilehon Debata di tonga ni keluarga, ulaon nang HuriaNa. Alai laos boi do

adong angka na pajut panghilalaan, na mangarsahi, parsahiton na mambahen holsoan hita.

Alai di borngin on, diarahon do hita asa manongtong mandok mauiate tu Debata, ala satia do Ibana mandongani huhut mangurupi jala mamasumasu hita mamulus ragam ni na masa di ngolunta be. Songon natarsurat di **1 Tesalonika 5:18** "*Mandok mauiate ma hamu siala saluhutna! Ai i do dipangido Debata sian hamu marhitehite Kristus Jesus*". Alani di taon baru on, gabe sada partingkian na uli ma on di hita laho mamulai dohot manguduti angka ulaonta be rap dohot Tuhan i, ai saguru di Ibana do sude manang aha pe na masa ngolunta on.

Apala di bona ni taon na imbaru on, adong do manang na piga na naeng pasunggulhononna tu hita. **Naparjolo**, mandok mauiate di hasatiaon ni Debata mandongani hita manalpuhon taon na buruk i. Andorang so mangalangka dope hita laho mamongoti taon na imbaru on, denggan do bilang-bilanganta ragam ni pasu-pasu naung tajalo be di angka taon-taon na salpu, asa marhite i diparmaloi hita laho mandok mauiate tu Debata. Di **Psalmen 103:2** didok, "*Puji ma Jahowa, ale tondingku, jala unang tung halupahon denggan ni basaNa sudena*". Nunga diurupi Debata hita manalpuhon ragam ni na maol di ngolunta be, alani tama do hita mandok mauiate sian nasa rohanta.

Napaduahon, porsea ma hita di sangkap na uli sinangkapan ni Debata di ganup ngolunta. **Jeremia 29:11** on ima padan ni Debata na paingothon hita, paboa holan sangkap nauli na denggan dohot sangkap hasonangan sinangkapan ni Debata di ganup na manghaposi Ibana. **Tuhan tidak hanya melihat hari ini, tetapi juga masa depan kita.**

Ndang taboto dope aha na masa ditaon na imbaru on, alai porsea jala pos do rohanta naung diparade Debata na dumenggan di ngolunta be. Alani, tapasahat ma sude diri nang ngolunta tu Ibana, tapaloas dipatulus Debata sangkapNa na uli marhite ngolunta, keluarganta nang ulaonta ganup.

Napatoluhon, laho mandalani taon na imbaru on, borhat ma hita dibagasan haporseaon dohot panghirimon na mangolu. Tapangke ma taon na imbaru on laho pauli-ulihon diri nang parsauranta tu Tuhan i. Di **Poda 3:5-6** didok, "*Marhaposan tu Jahowa ma ho sian nasa roham, jala unang marpangunsandean ho tu pingkiranmu sandiri. Sai Ibana ma tanda di nasa dalanmu, asa Ibana patigor angka dalanmu*". Ibana ma tapangasahon di

sude sipingikiran nang ulaonta be, asa dipatau hita manghamonanghon angka na maol di pardalanan ni ngolunta.

Napaopathon, mandok mauliate huhut rade pauli diri. Di Psalmen 90:12 didok, *“Sai parroha i ma hami mamilangi angka ariarinami, asa dapotan roha na bisuk hami”*. Marlapatan do i, asa di namandalani ngolu on ingkon tangkas do tujuan ni pardalananta, ima laho pasangap Tuhan i. Roha na bisuk (hati yang bijaksana), i do na mananda, mangaradoti jala na sai patujolohon lomo ni roha ni Debata.

Alani, tahamauliatehon ma pandonganion dohot pasu-pasu ni Debata naung tajalo be di taon na salpu, huhut tapagomgomhon ma diri nang ngolunta be tu Ibana huhut tapangido hagagoon dohot hataun laho mandalani taon na imbaru on. Amen.

08. Mandok hata huhut masijalangan : sian dakdanak sahat tu natoras

09. Marende BE HKBP No. 65 : 1 “Majumpang taon na imbaru on”

Majumpang taon imbaru on, di au dibahen Jesus

Dibaen rohaNa di au on, basaNa dipatulus

Ibana do manogu au, saluhut jea dipadao

Mambaen las ni rohangku

10. Tangiang Pangondianon

11. Marende BE HKBP No. 753:1-2 “Dipardalanan Jesus di jolongku” (Pelean) BL. 753

Di pardalanan Jesus di jolongku; Holong ni tanganMi manogu au

Nang di ngolungku Ho do sombaonhu; Tung sonang mardalan raphon au

Huboto do tangkas panoguonMu; Diiringiring Ho do langkangki

Sahat ro di ujung ni pardalanhu; Togu ma au jonok tu lambungMi

Patogu ma Tuhan haporseaonhu; Asa polin tu Ho manghirim au

Tu Surgo i patulus pardalanhu; TondiMi maringan ma di au

Huboto do tangkas panoguonMu; Diiringiring Ho do langkangki

Sahat ro di ujung ni pardalanhu; Togu ma au jonok tu lambungMi

12. Tangiang Panutup : Ale Amanami na di banua ginjang...Amen.

SELAMAT TAHUN BARU 2025

KIRANYA TAHUN 2025 MENJADI TAHUN BERKAT